

9. maj 1998

UPA 1998/25

Aalisarneq pillugu inatsisartut inatsisaata allanngortinneqarneranik

inatsisartut inatsisissaannut siunnersuut

pillugu

**Inatsisartut Aalisarnermut, Piniarnermut Nunalerinermullu
Ataatsimiititaliaata**

ISUMALIUTISSIISSUTAA

Suliarineqarnerani Inatsisartut Aalisarnermut, Piniarnermut Nunalerinermullu
Ataatsimiititaliap ilaasortarai

inatsisartunut ilaasortaq Siverth K. Heilmann (A), siulittaasoq
inatsisartunut ilaasortaq Lars Karl Jensen (S)
inatsisartunut ilaasortaq Niels MītāK (S)
inatsisartunut ilaasortaq Otto Steenholdt (A)
inatsisartunut ilaasortaq Johan Lund Olsen (IA)

Inatsisartut Aalisarnermut, Piniarnermut Nunalerinermullu Ataatsimiititaliaata
Aalisarneq pillugu inatsisartut inatsisaata allanngortinneqarneranik inatsisartut
inatsisissaattut siunnersuutip Inatsisartunit siullermeerneqareerneratigut inatsisissatut
siunnersuut oqaaseqaatitalik misissorpaa.

Aallaqqaasiullugu erseqqissaatigineqassaaq Naalakkersuisut inatsisip siunertaanik
allaaserisap aalajangiusimaneqarnissaanik kissaatigisaat ataatsimiititaliamit
isumaqataaffigineqarmat, tassami nunami aalisakkerivinni suliassaqartitsineq
inuiaqatigiinnut pingaaruteqarluinnartutut isumaqarfigineqarmat. Peqatigitilluguli
erseqqissaatigineqassaaq isumalluutit killeqarallartillugit pingaaruteqarmat
eqaatsunik tunisinissamut periarfissaqarnissaaq; minnerunngitsumik pisat
sapinngisamik eqqarneqartannginnissaaq eqqarsaatigalugu. Taamaammat
erseqqissarneqassaaq ataatsimiititaliamit pingaartinneqarmat nunami tunisinissamut
periarfissat killeqalersillugit umiarsuarnik tunitsiviliiisarnissamut
periarfissaqartitsisoqarnissaa. Taamaammat ataatsimiititaliami naammagisimaarlugu
maluginiarparput Naalakkersuisut inatsisissatut siunnersuutip
saqqummiunneqarnerani taamaattunik eqqarsaatersuuteqarlutik saqqummiussaartut.

Ataatsimiititaliami paasivarput Naalakkersuisut allannguutissatut siunnersuutaasa ilarpassui nunatta nunanut tamalaanut tunngatillugu pisussaaffiisa sunniutigigaat. Ataatsimiititaliap tama

tumunnga atatillugu pingaartippaa nunani allamiut angallataasa nunatsinni usingiartarnerat angallatinulluunniit allanut usingiartarnerat nakkutigineqartariaqartut, taamatullu ataatsimiititaliamit tamakkiisumik isumaqatigineqarluni nunani allamiut angallataasa nunatta erfalasuaniq iluaquteqarniarlutik erfalasuusarsinnaanerisa peerneqarnera.

Tamatumunnga atatillugu ataatsimiititaliap pingaartippaattaaq angallatit nunatsinneersut nunatsinni allanilu aalisarnissamut periarfissaasa qulakkeerneqarnissaat. Taamaammat Naalakkersuisut kaammattorneqarput angallatit nunatsinni nalunaarsorneqarsimasut nunat allat imartaanni nunallu tamalaat imartaanni annertunerusumik aalisarsinnaatitaalernissaat sulissutigiuartuaqqullugu.

Aalisariutit nunatsinneersut inuttalersugaanerannut atatillugu attuumassuteqarnissamik piunasaqaat pillugu § 22, imm, 1, nr. 2-p oqaasertaasigut erseqqissaasoqarnissaanik siunnersuut ataatsimiititaliamit tamakkiisumik isumaqataaffigineqarpoq. Taamaalippat inatsimmi pitsaanagerusumik ataqatigiittoqalissaaq, minnerunngitsumillu pingaaruteqarluinnarluni uagut nammineq aalisartortatta avataasiarluni aalisarnermut peqataanerulernissaannut periarfissiisoqarnissaa. Taamaammat inuttalersuisarneq pillugu malittarisassanik sukaterisoqarnissaa pissusissamisoorpoq.

Ataatsimiititaliami soqutiginarfillugu § 6, imm. 5-p allangortinneqarnissaanik siunnersuut oqallisigaarput, tassani Naalakkersuisut inuussutissarsiutigalugu aalisarnermik ingerlatsisinnaanermut piunasaqaatit pillugit inatsimmi aalajangersakkanik saneqqutsisinnaanermut periarfissaasa annertusisinnegartussaammata.

Ataatsimiititaliap siunnersuutikkut siunertarineqartut tunngavigalugit tamanna isumaqataaffigisinnaavaa minnerunngitsumillu taperserusullugu inuusuttut ajornannginnerusumik aalisarnermik inuussutissarsiuteqalersinnaanerata kisaatigineqarnera. Ataatsimiititaliaq isumaqarpoq inuusuttunut taamatut periarfissarissaarnerulersitsineq aalisarnermik inuussutissarsiortunut pingaaruteqarluinnartuusoq. Ataatsimiititaliaq isumaqarpoq pingaaruteqarluinnartoq nunatsinni inuusuttut periarfissanut taamaattunut ilisimaarinnilernissaat. Taamaammat ajornartorsiutaasinnaavoq immikkut akuersissuteqartarnermik annertusisitsinerup aquneqarnissaanut Naalakkersuisut eqqarsaatersuutaat inatsisip oqaasertaani namminerni allassimanngimmata.

Taamaattumik ataatsimiititaliap Inatsisartunut inassutigaa, § 6, imm. 5, nr. 2-p 3-llu allangortinneqarnerisa malitsigisaannik, § 6, imm. 3, nr. 4-mi piunasaqaatit atortinngitsoorneqarsinnaaneritut immikkut akuerineqarsinnaanermut periarfissat annertusineqarneri pillugit Naalakkersuisut inuiaqatigiinni innuttaasunut paasisitsiniaassasut, inuusuttut inuussutissarsiutigalugu aalisalersinnaanermut periarfissaat immikkut pingaartillugit.

Siunnersuutip siullermeerneqarnerani Naalakkersuisut kaammattorneqarput suliani inuusuttut inuussutissarsiutigalugu aalisarsinnaalernissamut piumasaqaataasunit saneqqutsisinneqarnissaat pineqartillugu KNAPK-p najukkani immikkoortortaarfii suleqatigineqartassasut. Taamatut kajumissaarineq matumuuna ataatsimiititaliamit Naalakkersuisunut kaammattuutigineqassaaq.

§ 15, imm. 4 allangortinneqarnissaanik Naalakkersuisut siunnersuutaat, tassa sinerissamut qanittumi pisassiissutit pigineqarsinnaasut 10 %-iniit 6 %-inut appartinneqarnissaannik, ataatsimiititaliamit nalilersuiffigeqqissaarniarneqarsimavoq. Siunnersuutigineqartoq ataatsimiititaliamit isumaqatigineqarsinnaavoq, tassa ataatsimiititaliap taperserusukkamiuk sinerissamut qanittumi aalisarnermi pisassiissutinit pigisanik piginnittut amerlanerulersinnaanissaat. Pingaaruteqarporli Naalakkersuisut maleruagassanik pisassiissutinit pigisat qanoq annertutigisut pissutsit sukkulluunniit atuuttut aallaavigalugit pigineqarsinnaanerannut tunngasunik nalilersuiuarsinnaanissaat.

Naggasiullugu ataatsimiititaliap Inatsisartunut ilaasortap Hans Enoksenip Royal Greenland A/S-p sinerissamut qanittumi raajarniutitaartornissaanik pilersaarutit unitsinneqarnissaannik siunnersuutaa oqallisigaa. Siunnersuutip suliarineqarnera Inatsisartut 1998-imi Ukiuunerani ataatsimiinneranni kinguartinneqarpoq. Ataatsimiititaliaq isumaqarpoq siunnersuummi siunertarineqartut tassa inuusuttut aalisartunngornissaannut pitsaannerusunik periarfissiisoqarnissaanik aamma aalisartut annertunerusunik pisassinneqartarnissaannik Naalakkersuisut inatsisissatut siunnersuutaatigut saqqummiunneqartukkut annertunerusutigut naammassineqartut.

Aalisarnermut, Piniarnermut Nunalerinermullu Ataatsimiititaliap taamatut oqaaseqarluni isumaqatigiilluni inassutigissavaa Aalisarneq pillugu inatsisartut inatsisaata allangortinneqarneranik inatsisartut inatsisissaattut siunnersuut saqqummiunneqarneratut iluseqartillugu pingajussaanniigassanngortinneqassasoq.

Siverth K. Heilmann (A)
siulittaasoq

Lars Karl Jensen (S)

Niels MītāK (S)

Otto Steenholdt (A)

Johan Lund Olsen (IA)